

दिनांक 22.11.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी दक्षिण अफ्रीका रा जोहान्सबर्ग मांय व्हे रह्या जी-20 शिखर सम्मेलन मांय वैश्विक विकास मानकां माथे ओजू विचार करण बाबत् जोर दीनो ।
- पीएम फसल बीमा योजना रा तैत जंगली जिनावरां ऊं साखां ने व्हेवण वाळा नुकसाण ई शामिल करी ज्या ।
- मजूरां रा न्यारा-न्यारा संगठन देश मांय लागू करी ज्या चार नुवा श्रम कानूनां रो स्वागत कीनो ।

अर

- प्रदेश मांय उप राष्ट्रीय पल्स पोलियो अभियान रा तैत काल 1 करोड़ ऊं बत्ता बच्चां ने पोलियो ऊं बचाव री खुराक देवणो तैय करी ज्यो ।

000

प्रधानमंत्री नरेन्द्र मोदी वैश्विक विकास मानकां माथे ओजू विचार करण री अपील कीनी है। वे दक्षिण अफ्रीका रा जोहान्सबर्ग मांय चाल रह्या जी-20 नेतावां रा शिखर सम्मेलन रा पहला सत्र मांय बोल रह्या हा। श्री मोदी कह्यो के जी-20 वैश्विक वित्त अर विकास ने गढ़यो है पण मौजूदा मॉडल रा तैत मोकळी आबादी ताई साधन नी पूग सक्या है। वे कह्यो के इण ऊं कुदरत रा बेजा दोहन ने बधावो मिल्यो है, जिण रो असर खास तौर ऊं अफ्रीका मांय निजर आ रह्यो है। प्रधानमंत्री मोदी कह्यो के नुवी दिल्ली मांय व्हेया जी-20 शिखर सम्मेलन रे दौरान करी ज्या ऐतिहासिक फैसलां ने आगे बधायी ज्या है। श्री मोदी जी-20 रा तैत वैश्विक पारंपरिक ज्ञान भंडार बणावण रो प्रस्ताव कीनो। वे कह्यो के जी-20 देशां ने सीख्योड़ा चिकित्सा विशेषज्ञां री टीम बणावणी चाहिजे, ताकि मुश्किल हालात मांय वां ने तुरत तैनात कर्या जा सके। श्री मोदी आज ब्रिटेन रा प्रधानमंत्री कीर स्टारमर अर संयुक्त राष्ट्र संघ रा महासचिव अंतोनियो गुतेरेश सागे मुलाकात कीनी ।

000

प्रधानमंत्री फसल बीमा योजना रा तैत अब जंगली जिनावरां रे कारण साखां ने व्हेया नुकसाण रो मुआवजो ई दियो जावेला। राजसमंद री सांसद महिमा कुमारी मेवाड़ ई फैसला सारु केंद्र सरकार रो आभार जतायो है। सांसद बतायो के वे कृषि मंत्री ने कागद लिख र ऐड़ा नुकसाण ने ई फसल बीमा योजना मांय शामिल करण री अरज कीनी ही।

000

खान विभाग जमीं हेटे ऊं खनिज निकाळबा ऊं जुड्या कामां सारु मोबाइल ऐप अर ऑनलाईन मॉड्यूल सुरु कीना है। विभाग रा प्रमुख सचिव टी. रविकान्त आज जयपुर मांय व्ही कार्यशाला मांय बतायो के 15 दिसम्बर ऊं अ सगळा काम पेपरलेस व्हेला। वे बतायो के विभाग ई-रवन्ना अर ई-पेमेंट समेत 14 मॉड्यूल बणाया है।

000

राज्य मांय बेगी ई ट्रॉमा केयर पॉलिसी बणायी जावेला अर सड़क हादसां रे कारण व्हेवण वाळा नुकसाण ने बचावण सारू खास एक्शन प्लान तैयार करी ज्यो है। मुख्य सचिव वी. श्रीनिवास आज जयपुर रा एसएमएस ट्रॉमा सेंटर रो दौरा कर्यां पाछे अहलकारां ने ई बारा मांय हुकम दीना। वे कह्यो के राज्य रा सगळा ट्रॉमा सेंटरां ने और मजबूत बणाया जावेला, ताकि जनहानि ने कम करी जा सके। मुख्य सचिव ट्रॉमा सेंटरां मांय जरूरी तादाद मांय आईसीयू बिस्तर, जिन्दगी बचावण वाळा साज-ओ-सामान अर सीख्योड़ा मेडिकल स्टाफ री उपलब्धता तैय करण बाबत् ई कह्यो।

000

सूचना अर प्रसारण मंत्रालय रा सचिव संजय जाजू आज आकाशवाणी रा जोधपुर केन्द्र रो दौरा कीनो। वे अहलकारां सागे मीटिंग मांय कार्यक्रमों री गुणवत्ता और बेहतर बणावण बाबत् कह्यो। श्री जाजू स्थानीय भाषा मांय कार्यक्रम बधावण माथे ज़ोर दीनो ताकि क्षेत्रीय समाज ऊं सीधो जुड़ाव मजबूत बण सके। वे कह्यो के दूरदर्शन अर आकाशवाणी री जिम्मेदारी अब और बध गयी है। सूचना अर प्रसारण सचिव आकाशवाणी रा कार्यक्रमों ने ओटीटी प्लेटफॉर्म वेब्स माथे लावण बाबत् ज़ोर दीनो, ताकि प्रसारण री पहुंच सरहदी हलकां ताई मजबूत बण सके।

000

केन्द्र सरकार कानी ऊं काल लागू करी ज्यो चार नुवा श्रम कानूनां रो भारतीय मजदूर संघ स्वागत कीनो है। संघ रा राष्ट्रीय सचिव गिरीश आर्य कह्यो के ओ मजूरों सारू आज्ञादी पाछे करी ज्यो सब ऊं मोटो सुधार है। वे कह्यो के इण ऊं मजूर मजबूत बणेला। भारतीय ट्रेड यूनियनों रा राष्ट्रीय मोर्चा रा अध्यक्ष डॉ. दीपक जायसवाल कह्यो के नुवा श्रम कानून लागू व्हेवण ऊं असंगठित हलकां मांय काम कर रह्या करीब पचास करोड़ लोगों ने न्यूनतम मजदूरी मिलणो तैय व्हे जावेला। वे कह्यो के आं कानूनां मांय महिलावां सारू एक सरीखा काम बाबत् एक सरीखा वेतन रो ई प्रावधान है। श्री जायसवाल बतायो नुवा कानूनां मांय व्यक्तिगत स्वास्थ्य अर हिफाजत ऊं जुड़्या जूना कानूनां मांय नुवा प्रावधान जोड़ी ज्यो है।

नुवां श्रम कानूनां रो स्वागत करता थकां श्रम संगठन नैसकॉम कह्यो के वो उद्योग जगत ने ई बदलाव ने आत्मविश्वास सागे अपणावण मांय मदद करण सारू सगळा हितधारकां सागे मिल र काम करेला।

000

प्रदेश मांय काल उप-राष्ट्रीय पल्स पोलियो अभियान चलायो जावेला। ई रा तैत पांच साल ताई रा एक करोड़ ऊं बत्ता बच्चां ने पोलियो री बीमारी ऊं बचाव री दवा पावणो तैय करी ज्यो है। अभियान सारू पूरा राज्य मांय 58 हजार 823 पोलियो बूथ बणायी ज्यो है। ई सागे ई 6 हजार ऊं बत्ती हलती-चलती टीमां अर आठ हजार ऊं बत्ती मोबाइल टीम बणायी ज्यो है, जो दवा नी पी सक्या बच्चां ने आवता दो दिन ताई आ दवा पिलावेला। उप राष्ट्रीय पल्स पोलियो अभियान रा बारा मांय जाग जगावण सारू राज्य मांय आज न्यारा-न्यारा कार्यक्रम राख्यो ज्यो। पाली मांय पाँच साल ताई रा बच्चां ने काल पोलियो ऊं बचाव री दवा पावण री अरज करता थकां राजकीय बांगड़ अस्पताल ऊं जागरुकता रैली निकाळी ज्यो। बालोतरा मांय ई जन-जागरुकता रैली निकाळ र लोगों ऊं काल पोलियो बूथ माथे जा र बच्चां ने आ खुराक पावण री अपील करीजी अर ई पाछे आवता दो दिन ताई घर-घर जा र पोलियो ऊं बचाव री खुराक पावण रा बारा मांय जाणकारी दीरीजी। भरतपुर रा एसडीएम राहुल सैनी बतायो के अभियान रा तैत जिला रा 2 लाख 8 हजार ऊं बत्ता बच्चां ने पोलियो ऊं बचाव री दवा री खुराक पावणो तैय करी ज्यो है।

000

खेलो इंडिया यूनिवर्सिटी गेम्स 24 नवम्बर ऊं जयपुर मांय सरू व्हे रह्या है। इण मांय 24 खेलां री होड़ां राख्यो जावेला। राजस्थान राज्य क्रीड़ा परिषद रा अध्यक्ष डॉ. नीरज के. पवन आज आकाशवाणी सागे बातचीत मांय बतायो के होड़ रा मुकाबला राज्य रा सात ई संभागां मांय व्हेला। आं मांय एथलेटिक्स, बैडमिंटन, हॉकी, तैराकी, तीरंदाजी, शूटिंग, कैनोइंग अर कयाकिंग सरीखा खेल शामिल है। वे बतायो के उद्घाटन जळसो जयपुर रा सवाईमानसिंह स्टेडियम मांय व्हेला।

ओ खास इन्टरव्यू आकाशवाणी जयपुर-अजमेर ऊं आज रात आठ बज्यां प्रसारित कर्यो जावेला।

000

राज्य मांय वोटर लिस्टां रा गहन पुनरीक्षण अभियान—एसआईआर रा बारा मांय जाग जगावण सारू लगातार कार्यक्रम राख्या जा रह्या है। अजमेर मांय आज दो गैर—सरकारी कॉलेजां मांय अढाई सौ ऊं बत्ता स्टाफ रा कर्मचारियां अर विद्यार्थियां ने एसआईआर गणना प्रपत्र ऑनलाइन तरीका ऊं भरण रा बारा मांय जाणकारी दीरीजी। ओ प्रपत्र निर्वाचन आयोग री वेबसाइट रे जरिये खुद भर्यो जा सके है। कार्यक्रम मांय मौजूद लोगां ने मौके ई इलेक्ट्रॉनिक फॉर्म ऑनलाइन भर र बतायी ज्या। सवाईमाधोपुर ज़िला मांय 10 लाख 54 हजार मतदातावां मांय ऊं आज दोपहरां तांई 7 लाख 13 हजार ऊं बत्ता गणना प्रपत्र ईसीआई नेट माथे अपलोड कर दिया ज्या। भरतपुर रा ज़िला निर्वाचन अधिकारी बतायो के ज़िला मांय आज संवारे तांई करीब 67 फीसदी गणना प्रपत्र डिजिटाइज़ कर दिया ज्या। डीग रा ज़िला निर्वाचन अधिकारी उत्सव कौशल बतायो के ज़िला मांय बीएलओ अर प्रशासन एसआईआर रा काम मांय लाग्योड़ा है अर इण रा बेहतर नतीज़ा मिल रह्या है।

000

केन्द्र सरकार राष्ट्रीय कैडेट कोर—एनसीसी रा कैडेटां री तादाद 17 लाख ऊं बधा र 20 लाख करण माथे विचार कर रही है। रक्षा सचिव राजेश कुमार सिंह 78वां एनसीसी दिवस री पहली वाळी सिज्यां नई दिल्ली मांय राष्ट्रीय समर स्मारक माथे राख्यी ज्या कार्यक्रम मांय आ जाणकारी दीनी। वे कह्यो के नौजवानं देश री बरकत मांय खास काम कर रह्या है। ऐड़ा हाल मांय देश रा विकास अर हिफाजत मांय वां रा योगदान ने बधावण रा बारा मांय विचार कर्यो जा रह्यो है। ई बीचे एनसीसी रो 78वां स्थापना दिवस काल देशभर मांय केई कार्यक्रमां सागे मणायो जावेला।

000